

廿二史考異

唐書十二

廿二史攷異五十二

錢大昕學

蕭銑傳

若銑力困計殫以好言自釋於下係虜在廷抗辭不屈  
偽辯易窮卒以殊死高祖聖矣哉 按蕭銑梁之後  
裔爲衆所推非有失德及唐兵深入自揣勢力弗若  
不惜生降以全民命其荅高祖以田橫自比蓋道其  
實耳高祖自慮養虎貽患故亟除之如李密王世充  
之徒雖低首屈服終亦不免視宋祖之待劉鋹有媿  
色矣以是爲聖未之前聞

輔公祐傳

遂僭位國稱宋 唐初羣雄割據自立年號皆書於本  
傳惟公祐傳不言年號蓋史之闕也楊文公談苑記  
江南保大中浚秦淮得石志案其刻有大宋乾德四  
年字令諸儒參驗乃輔公祐反江東時年號然新舊  
書通鑑皆未及載萬斯同紀元稹攷謂公祐紀元天  
明與楊氏談苑又異

劉思禮傳

少學相人於張愬藏愬謂思禮歷刺史位至太師

按舊唐書思禮少嘗學相術于張愬藏相已必歷刺

史位至太師揆其文義謂思禮自相當得太師非愷  
臧許之也新史改竄失其本旨

李安遠傳

累封至廣德郡公 石刻武德四年秦王告少林寺教  
有德廣郡開國公安遠名卽李安遠也傳作廣德郡  
誤

段志元傳

齊州臨淄人 神道碑作鄒平

諡曰壯肅 當作忠壯舊史本傳唐會要及神道碑竝  
作忠壯獨此云壯肅字之譌也

殷開山傳

祖不害仕陳爲司農卿 按殷踐猷傳稱陳給事中不

害

劉崇魯傳

景福中以水部郎中知制誥雅與崔昭緯善帝以韋昭  
度李嶠輔政昭緯懼見奪共謀沮之及嶠墨麻出崇  
魯輒掠麻大哭帝問焉崇魯曰今雖乏人豈宜取愴  
人爲宰相嶠以楊復恭西門重遂得近職奈何用之  
前日杜讓能羞戮未刷尚忍蹈覆轍乎嶠由是不得  
相嶠亦劾奏其姦因自陳爲山南楊守亮詆毀不容

與復恭交私又言崇望爲宰相使親吏日夕謁左軍  
與復恭相親厚純巾慘帶不入禁門崇魯向殿哭厭  
詛天祚殆人之妖且其父坐賄飲藥死崇魯身爲朱  
玫史官作勸進表在太原府使西川見田令孜沒階  
趨廢制度自崇魯始其相嘗嘗俚淺稽校譬市人狀  
此事又見李磻傳此詳而彼畧彼傳載崇魯言又  
有磻弟爲時溥所殺一事蓋挾方鎮以恐惕朝廷故  
引杜讓能爲誠此傳不言時溥事則讓能覆轍之語  
全無著矣

許紹傳

子智仁終涼州都督 唐會要智仁官懷州刺史孝昌  
縣男諡曰敬

許圜師傳

進戶部尚書卒 唐會要圜師封平恩縣公舊史作平

恩縣男

溫大雅傳

諡曰孝 唐會要作景

溫彥博傳

突利可汗弟結社謀反 按太宗紀魏徵突厥兩傳俱

作結社率此脫率字

彥博裔孫廷筠弟廷皓 宰相世系表失載廷筠廷皓

二人

李子和傳

進金紫光祿大夫 唐會要贈靈州都督諡曰德

李勣傳

勣子震嗣終桂州刺史 唐會要有梓州刺史李震諡

曰定疑卽勣子也

薛萬均傳

帝震悼爲舉哀 唐會要萬均贈幽州都督諡曰景

高士廉傳

攷異

唐書十二

四



高儉字上廉以字顯 宰相世系表作宗儉

竇抗傳

贈并州都督 唐會要諡曰肅

竇德元傳

威從孫德元 按宰相世系表竇略五子興拔岳善熾  
岳之子毅熾之子威威與毅爲從兄弟德元爲毅之  
曾孫則威之從曾孫矣

房元齡傳

元齡字喬 宰相世系表作喬松

杜元穎傳

知晦五世孫元穎 按宰相世系表元穎乃淹之六世孫舊唐書杜審權傳云如晦六代孫審權爲元穎從子與此傳合

魏徵傳

帝將以衡山公主降其子叔玉 按公主傳太宗二十  
一女無封衡山者攷于志寧傳云衡山公主旣公除  
將下嫁長孫氏則是衡山停婚魏氏後許嫁長孫矣  
公主傳下嫁長孫氏者有新興新城兩公主未審何  
人初封衡山也

薛收傳

永徽中又贈太常卿 收諡曰獻收子元超諡曰懿文

見唐會要

薛稷傳

道衡曾孫 據宰相世系表乃四世孫

馬周傳

追贈尚書左僕射 唐會要贈尚書左僕射諡曰忠

韋挺傳

慶州刺史楊文幹坐大逆誅辭連東宮帝專責官臣由

是挺與杜淹王珪等皆流越嶲 按杜淹傳亦云慶

州總管楊文幹反辭連太子歸咎淹及王珪韋挺並

流越雋文既重出以事攷之亦未核王珪韋挺皆建  
成東宮官杜淹則秦王府官也文幹反辭連東宮珪  
挺固宜獲咎於淹何預而同貶斥乎攷隱太子建成  
傳云華陰楊文幹素凶詖建成昵之使爲慶州總管  
遣募兵送京師欲爲變文幹遽率兵反帝以建成首  
謀未忍治卽詔捕王珪魏徵及左衛率韋挺等欲殺  
之以薄建成罪會文幹陷寧州帝召秦王問計對曰  
文幹豎子耳官司當卽禽之帝曰事連建成恐應者  
衆爾自行還吾以爾爲太子使建成王蜀蜀地狹不  
足爲變若不能事汝取之易也秦王率衆趣寧州文

幹爲其下所殺以首降秦王之行元吉及內嬖夏爲  
建成請帝意解復詔建成居守但責兄弟不相容而  
謫王珪韋挺天策兵曹參軍杜淹于遠方是珪挺淹  
三人之謫乃坐構毀太子秦王而非以文幹事得罪  
也王珪傳稱太子與秦王有隙帝責珪不能輔導太  
子流蜀州蓋得其實

韋荷價傳

流荷價繡州卒 按唐會要待價扶陽郡公諡曰元當  
是身後追復本官

韋武傳

諡吏部尚書 唐會要諡曰恭

李光亮傳

大亮族孫迴秀 按宰相世系表當是族子

陳叔達傳

貞觀初與蕭瑀爭殿中坐忿許不恭免官 宰相表武

德九年十月叔達瑀坐事免非貞觀初

物師道傳

日懿 唐會要師道諡兩見一云懿一云康

楊執柔傳

乃以執柔同中書門下三品未幾卒 唐會要執柔贈

攷異

天官尚書諡曰貞

封倫傳

祖隆北齊太子太保 當作隆之史脫之字

裴矩傳

裴矩字宏太 宰相世系表作世矩傳避太宗諱去世  
字矩隋書有傳入唐無大表見雖不立傳可也此傳  
首尾一千五百五十餘字述隋事者什之七八既與  
隋史重複兼亦失於限斷當云仕隋至某官事見前  
史乃繼以仕宇文化及竇建德事斯爲得之若封倫  
蕭瑀輩舊史無傳者固不妨述其梗槩也

閻立本傳

卒諡曰文貞 唐會要無支字

韋宏機傳

孫岳子岳子孫皋別有傳 按韋皋傳六代祖範有勳

力周隋間不言爲宏機之後若依此傳則皋爲宏機

之元孫皋之六世祖卽宏機祖也此傳云祖元禮隋

浙州刺史

浙當作浙

不名範兩傳必有一誤又此傳岳子

乃兩字名而舊史良吏傳單稱岳亦未知誰是

蕭瑀傳

久之遷左僕射貞觀初房元齡杜如晦新得君事任稍



分瑀不能無少望乘辨切詆辭旨疏躁太宗怒廢于家俄拜特進太子少師復爲左僕射坐與陳叔達忿爭御前不恭免歲餘起爲晉州都督入拜太常卿遷御史大夫參預朝政會元齡等小過失瑀卽痛劾不報由是自失罷爲太子少傅加特進復爲太常卿九年復參預政事晉王爲皇太子拜太子太保同中書門下三品瑀中狹每燕見輒言元齡輩朋黨盜權帝積久亦不平瑀好浮屠法間請捨家爲桑門帝許之矣復奏自度不能爲又足疾不入謁詔奪爵下除商州刺史今以宰相表攷之瑀五入相而五罷武德

元年由隋民部尚書爲內史令六年遷尚書右僕射  
九年轉左僕射其年十月與陳叔達俱坐事免此一  
罷也貞觀元年六月由太子少師爲尚書左僕射其  
年十二月罷此再罷也四年二月復以御史大夫參  
議朝政其年七月罷爲太子少傅此三罷也九年十  
一月復以特進參預朝政十年十二月罷爲岐州刺  
史此四罷也十七年四月又以特進太子太保同中  
書門下三品二十年十月貶商州刺史此五罷也傳  
於貞觀十年罷相一節畧而不書其與陳叔達忿爭  
免官乃在武德九年太宗雖已卽位猶未改元而誤

以爲貞觀初

其誤與陳叔達傳同

且係第一次罷相而誤以爲

弟二次皆自相抵牾也

蕭嗣業傳

擢累鴻臚卿兼單于都護府長史 龍朔元年嗣業爲

扶餘道行軍總管伐高麗又爲仙峒道行軍大總管

伐鐵勒傳皆失書

蕭定傳

遷袁潤等六州刺史大歷中有司差天下刺史治最定

與常州蕭復豪州張鎰爲弟一 按蕭復傳但云歷

歙池二州刺史治狀應條遷湖南觀察使改同州刺

史不云爲常州刺史者闕也復定二人竝附禹傳未  
而前後不相應如此

褚亮傳

諡曰康 唐會要亮諡兩見一云康一云文康未詳其  
審

姚班傳

班著紹訓以發明舊義云 按藝文志有姚瑱漢書紹  
訓四十卷卽此書也班瑒字形相涉或宋初避諱瑒  
字缺末筆後人誤仞爲班耳

令狐德棻傳

父熙隋鴻臚卿 宰相世系表隋吏部尚書武康公攷  
隋書熙嘗任鴻臚卿又以本官兼吏部尚書判五曹  
尚書事後終於桂州總管史稱鴻臚卿者當時以京  
職爲重吏部未正授故亦不書也

累進爵彭城縣子 彭城當作彭陽傳寫之譌也北史

敘傳稱德棻爲彭陽公德棻大父整亦封彭陽公

曾修晉家史房元齡奏起之預柬凡十有八人 按藝

文志修晉書者房元齡褚遂良許敬宗來濟陸元仕  
劉子翼令狐德棻李義府薛元超上官儀崔行功李  
季風辛邱馭劉引之陽仁卿李延壽張文恭敬播李

安期李懷儼趙宏智等自房相外蓋不止十八人也  
顧允傳

中子琮武后時爲天官侍郎同鳳閣鸞臺平章事 唐  
會要贈越州都督涇源縣侯諡曰靖

于志寧傳

志寧與司空李勣修定本草并圖合五十四篇 卽所  
謂顯慶本草也藝文志載撰述人無志寧名  
張易之傳

時無檢輕薄者又諂言昌宗乃王子晉後身 據外戚  
傳乃武三思倡言

乃詔昌宗卽禁中論著引李嶠張說宋之間富嘉謨徐  
彥伯等二十有六人撰三教珠英 按藝文志三教  
珠英一千三百卷張昌宗李嶠崔湜閻朝隱徐彥伯  
張說沈佺期宋之間富嘉謨喬品員半千薛曜等撰  
又李適傳武后修三教珠英書以李嶠張昌宗爲使  
取文學士綴集於是適與王無競尹元凱富嘉謨宋  
之間沈佺期閻朝隱劉允濟在選又徐堅傳與徐彥  
伯劉知幾張說與修三教珠英時張昌宗李嶠總領  
彌年不下筆堅與說專意撰綜條彙粗立諸儒因之  
乃成書此四處重出而人數多寡同異各殊所當

併以歸於一也

長孫无忌傳

太子承乾廢立晉王以无忌爲太子太師同中書門下  
三品同三品自此始 按太宗紀貞觀十七年四月  
立晉王治爲皇太子特進蕭瑀爲太子太保李勣爲  
太子詹事同中書門下三品宰相表亦止載蕭瑀李  
勣二人其时无忌爲太子太師房喬爲太子太傅紀  
表皆不書者非宰相之職例不當載也百官志其後  
李勣以太子詹事同中書門下三品謂同侍中中書  
令也而同三品之名蓋起于此亦不舉无忌朕则无



忌傳云同中書門下三品者殆誤矣吳氏糾謬謂宰相表有關文蓋攷之未審

褚遂良傳

神龍中復官爵 唐會要諡曰文忠

韓瑗傳

父仲良終刑部尚書秦州都督府長史潁川縣公 據

仲良碑貞觀十二年薨贈兵部尚書諡曰定會要以

爲諡貞者誤

神龍初武后遺詔復官爵 唐會要諡曰貞

來濟傳

初濟與高智周郝處俊孫處約客宣城石仲覽家仲覽  
衍于財有器議待四人甚厚私相與言志處俊曰願  
宰天下濟及智周亦狀處約曰宰相或不可冀願爲  
通事舍人足矣後濟領吏部處約始以瀛州書佐入  
調濟遽注曰如志遂以處約爲通事舍人後皆至公  
輔云 此事又見高智周傳吳氏糾謬已言其叢複  
矣而容齋四筆又辨之云此事本出韓琬所撰御史  
臺記而所載自不實處約傳貞觀中爲齊王祐記室  
祐多過失數上書切諫王誅太宗得其書擢中書舍  
人是歲十七年癸卯來濟次年亦爲中書舍人永徽

三年拜相六年檢校吏部尚書是歲丁巳去癸卯首尾十五歲若如兩傳所書大爲不合仲覽鄉里一以爲宣城一以爲江都豈宣城人而家于廣陵也

濟異母兄恆上元中爲黃門侍郎同中書門下三品

唐會要贈太子少師來恆諡曰忠贈潤州刺史來恆諡曰懿蓋一人而傳聞異詞

世知溫傳

子泰之開元時爲工部尚書諤之爲將作少匠與誅二張功封博陵縣侯按宰相世系表泰之初以璣方邪中預平二張諤之初以商州司馬預平韋后功弟

二與此傳互異

趙宏智傳

宏安曾孫矜 矜舊史無傳此采柳子厚所撰墓志添  
人宋子京好退之子厚文故於韓傳載進學解佛骨  
表湖州謝上表祭鱸魚文凡四篇藩鎮傳載平淮西  
碑孝友傳載復讎議陳京傳載禘祫議許遠傳載張  
中丞傳後序李渤傳載愈所與書張籍傳載愈答書  
甄濟傳載愈答元微之書於柳傳載與蕭翰林俛許  
京兆孟容書貞符懲咎賦凡四篇孝友傳載駮復讎  
議孝門銘宗室傳載封建論貞行傳載與何蕃書段

攷異

古

秀實傳亦多采宗元所撰逸事衆舊史惟退之傳載文四篇與新史同餘皆子京所采也

宜遇西人深目而髯乃得其實 按柳子厚撰趙君墓志云乙巳于野宜遇西人深目而髯其得實因皆韻語也史家刪改遂至失韻

崔敦禮傳

崔敦禮字安上 宰相世系表安上字敦禮

楊纂傳

贈揚州都督諡曰恭 唐會要恭作敬宋人避諱往往改敬爲恭如楊纂柳亨輩疑本諡敬而後人追改也

纂從子昉終工部尚書 唐會要諡曰恪

劉從一傳

贈太子太傅 唐會要諡曰毅

傅奕傳

上疏極詆浮圖法 奕言五帝三王未有佛法君明臣忠年祚長久石苻亂華主庸臣佞政虐祚短事佛致朕昌黎諫迎佛骨表其說實本於此

呂才傳

魯桓公六年七月子同生 經書九月此據夏正故云  
七月

歲在乙亥月建申辰則值祿空亡 乙祿在卯丙申月  
卯爲截路空亡

又觸句絞六害借驛馬身尅驛馬三刑 亥與申相害  
故云六害亥卯未驛馬在巳申在巳前爲借巳刑申  
故云三刑月建爲身巳火尅申金身爲驛馬所尅也  
命火也生當病解 乙亥納音火也火病于申

唯向命一物法當壽 亥爲本命生于申月申在亥後  
爲向命

秦莊襄王四十八年始皇帝生 莊襄當作昭襄

是歲壬寅正月命借祿 壬祿在亥生于寅月在亥前

爲情也

又破驛馬三刑身尅驛馬 寅午戌驛馬在申寅破申  
申刑寅故云破驛馬三刑也申金尅寅木身爲驛馬  
所尅也

命金也正月爲絕 壬寅納音金金絕於寅  
又建命生 寅爲本命月建在寅是爲建命

漢武帝以乙酉歲七月七日平旦生當祿空亡 乙祿  
在卯生于丙申月卯爲截路空亡

雖向驛馬乃隔四辰 己酉丑驛馬在亥申至亥隔四  
辰申在亥後爲向



後魏高祖孝文皇帝生皇興元年八月是歲丁未爲背  
祿命與驛馬三刑身尅驛馬 丁祿在午未爲本命  
亥卯未驛馬在巳生于酉月在巳午未三辰之前故  
皆爲背也酉爲自刑故云三刑巳火尅酉金亦驛馬  
尅身也

又生父死中 未土爲本命生於酉月火死于酉火者  
土之父也

宋高祖癸亥三月生祿與命皆空亡 癸祿在子亥爲  
本命生于丙辰月亥爲截路空亡子爲旬中空亡

又生子墓中 水墓于辰亥本命屬水納音亦屬水生

於辰月是爲己墓而云子墓所未詳也

又生祿祿下 土爲水之祖土以己爲祿生于辰月故  
云祖祿下

唐書十三

廿二史攷異五十三

錢大昕學

裴行儉傳

諡曰獻 唐會要作憲

裴光廷傳

光廷字連城 神道碑作光庭

博士孫琬以其用循資格非獎勸之誼諡曰克平 舊

史無平字

特賜諡曰忠憲詔中書令張九齡文其碑 舊史憲作

獻攷唐會要及光庭神道碑光庭子稹墓志孫倩神

攷異

唐書十三

一

道碑皆作忠獻則此文誤也

裴均傳

贈司空 唐會要贈太子少保裴均諡曰貞

崔神慶傳

贈神慶幽州都督 唐會要贈幽州都督魏縣男崔神慶諡曰貞贈太子少傅魏縣子崔神慶諡曰質蓋卽一人而傳聞異詞

神慶子琳開元中與高仲舒同爲中書舍人侍中宋璟親禮之每所訪逮嘗曰古事問仲舒今事問琳尚何疑 仲舒附忠義高徽傳亦祇載此一事

楊再思傳

張昌宗坐事司刑少卿桓彥範劾免其官昌宗訴諸朝  
武后意申釋之間宰相昌宗於國有功乎再思曰昌  
宗爲陛下治丹餌而愈此爲有功 此事又見昌宗  
傳

王珣傳

王珣者方慶六世孫 按方慶傳在卷四十二而珣傳  
乃在卷三十四此前後之失序者吳縝譏裴守貞耀  
卿兩傳次序失當而於珣傳獨未及之

執失思力傳

謹曰景 唐會要謹曰繆

契苾何力傳

鐵勒哥論易勿施莫賀可汗之孫父葛隋末爲莫賀咄  
特勒 按回鶻傳云契苾酋哥楞自號易勿真莫賀  
可汗弟莫賀咄特勒皆有勇莫賀咄死子何力尚幼  
率其部來歸則何力乃哥楞弟子非其孫也論楞聲  
相近此傳云易勿施彼傳云易勿真未詳孰是  
薛延陀傳  
亦作易  
勿真

是時吐谷渾王伏允在突淪川 吐谷渾傳伏允走圖  
倫磧卽突淪川也譯音無定字

西突厥阿史那賀魯以處月處密姑蘇歌邏祿卑失五  
姓叛 按突厥傳賀魯居多邏斯川統處月處密姑  
蘇歌邏祿弩失畢五姓之衆此卑失卽弩失畢也密  
蜜音同歌邏祿或作葛邏祿

醜曰毅 唐會要何力諡曰烈

尚可孤傳

徙封馮翊郡王食實戶一百五十 按下文又云封馮  
翊郡王食實戶二百重複不倫當云增封戶至二百  
或中間以事削封邑而後復之則史有脫文矣

王珣傳

列傳  
贈戶部尚書諡曰孝 唐會要贈禮部尚書王珣諡文

孝

薛平傳

贈太傅 唐會要諡成肅

程務挺傳

后遣左鷹揚將軍裴紹業卽軍中斬之 唐會要務挺

贈左衛將軍諡曰烈此傳失書不知何時昭雪也

韓思彥傳

事博士谷那律律爲匪人所辱思彥欲殺之律不可

谷那律見儒學傳谷姓那律其名也此單稱律似以



谷那爲姓矣

司農武惟良擅用井州賦二百萬緡思彥劾處死武后  
爲請而免李義府與諸武共譖思彥出爲山陽丞

按武惟良爲司農后妃外戚兩傳俱未及載且惟良  
等旣爲武后所銜欲置之死地何以又請免其罪又  
其時后寵雖盛而諸武無當權者此譖思彥者果何  
人乎

柳澤傳

曾祖亨贈禮部尚書幽州都督 唐會要諡曰敬  
中宗時長寧宜城安定諸公主 安定當作定安

唐臨傳

兄皎終益州長史贈太常卿 唐會要諡曰敬

徐有功傳

會昌中追諡忠正 按諡法無正字宋時避仁宗嫌名  
改貞爲正唐會要所載諡正者皆貞也有功之諡亦  
當爲忠貞蓋修史之時或改或不改其例初不畫一  
耳

仁傑傳

召見仁傑謂曰臣反何邪對曰不臣反死笞掠矣  
臣當作承

今阿史那斛瑟羅皆陰山貴種 按舊史無皆字斛瑟羅者西突厥繼往絕可汗步真之子阿史那其姓也新史多一皆字似誤以爲二人

王方慶傳

六世孫璵

璵傳亦云方慶六世孫

據宰相世系表當云五世孫

沈炳震曰方慶以萬歲通天元年入相璵以肅宗乾元元年入相相去僅六十三年不應遽有六世孫位至宰相且方慶子光輔開元中官潞州刺史而璵傳云開元末爲太常博士據表光輔卽璵之高祖同時而仕恐未必然蓋肅宗時相乃別一王璵非方慶六

攷異

世孫也

武侯將軍田仁會 仁會傳但云左武侯中郎將不云

將軍

韋嗣立傳

監察御史宋務光建言願停徵封一切附租庸輸送不  
納 務光疏已詳見本傳而此傳又及之何其詞之  
贅也

陸象先傳

時窮治忠義等黨與 當云至忠忠上脫至字

李日知傳

景龍初同中書門下平章事轉御史大夫仍知政事拜  
侍中先天元年罷爲刑部尚書 按睿宗紀宰相表

日知以景雲元年六月由黃門侍郎同中書門下三  
品傳以爲景龍初者誤也傳云平章事紀表俱作同  
三品當以紀表爲正宰相表又云景雲二年四月日  
知守侍中其年十月罷爲戶部尚書傳以爲先天元  
年差校一年又以戶部爲刑部亦誤也其轉御史大  
紀表並  
不載

李懷遠傳

贈侍中諡曰成 唐會要贈侍中平鄉縣公李懷遠諡

曰成又有贈侍中趙郡公李懷遠諡曰惠疑一人而傳聞異詞也

魏元同傳

先是狄仁傑督太原運失米萬斛將坐誅元同救免

此事仁傑傳不載

韋見素傳

是歲

至德元載

十月丙申有星犯昴見素言于帝曰昴者胡

也明年正月甲寅祿山其殪乎及祿山死日月皆驗

按肅宗紀至德二載正月乙卯安慶緒弑其父祿

山與見素所占差一日又祿山傳正月朔祿山朝羣

臣創甚罷是夜猪兒入帳下以大刀斫其腹腸漬於  
牀卽死攷至德元載十月辛巳朔日食從此推之次  
歲正月當爲庚戌朔甲寅乙卯乃月之五六日而祿  
山傳謂死于正月朔與紀傳皆不合未審誰得其實  
天文志不載至德元載十月星犯昴事非志有脫漏  
則見素傳所云傳聞不足信矣

韋虛心傳

贈揚州大都督諡曰正 按唐會要虛心與李綱崔義  
元王方慶李乂輩皆諡正正卽貞也新史采自它書  
多有未及訂正者如徐有功之諡忠正亦舊史所無

白敏中傳

懿宗立召拜司徒門下侍郎遷平章事 遷字衍

敬暉傳

睿宗時追復官爵諡曰肅愍 唐會要元和三年追諡

張柬之爲文貞桓彥範爲忠烈敬暉爲貞烈崔元暉  
爲文忠袁恕已爲貞烈士載桓張袁三人諡與會要  
同惟敬暉諡肅愍崔元暉諡文獻爲異豈史所載者  
乃睿宗朝所賜之諡乎

張柬之傳

姚州本龍朔中武陵王簿石子仁奏置其後長史李孝



讓辛文協死於羣蠻詔遣郎將趙武貴討擊兵無噍類又以將軍李義總繼往而郎將張惠基戰死其州遂廢垂拱中蠻郎將王善寶昆州刺史爨乾福復請置州言課稅自支不旁取于蜀及置州掾李稜爲蠻所殺延載中司馬成琛更置瀘南七鎮戍以蜀兵蜀始擾矣且姚府總管五十七州間皆巨猾游客按

地理志姚州雲南郡武德四年以漢雲南縣地置與東之所稱不同志又云武德四年以古滇王國民多

姚姓因置姚州都督并置州十二

日子州異州五陵州袖州和往州舍

利州范鄧州野共州洪鄧州日南州眉鄧州遣備州洛諾州實十三州也

隸姚州都督府

而東之稱姚府總管五十七州亦不合

舊書高宗紀麟德元年於

昆明之弄棟川置姚州都督與志傳年月又異

子愿漪愿仕至襄州刺史漪著作佐郎宰相世系表

東之子漪著作郎漪子愿吳郡太守兼江東採訪使

姚崇傳

諡曰文獻按張說撰神道碑云諡文貞其諡文獻者

乃崇之父懿也史誤

蘇幹傳

父勗尚南康公主公主傳作南昌

李元紘傳

曾祖粲左監門大將軍諡曰明 唐會要明作胡

杜暹傳

于闐王尉遲眺約突厥諸國叛暹覺其謀發兵討斬之  
支黨悉誅更立君長于闐遂安 按西域傳于闐國  
王無名眊者且亦無叛而復安之事

韓臯傳

聞鼓琴至止息歎曰美哉嵇康之爲是曲其當晉魏之  
際乎王凌母邱儉文欽諸葛誕繼爲揚州都督咸有  
興復之謀皆爲司馬懿父子所殺康以揚州故廣陵  
地凌等皆魏大臣故名其曲曰廣陵散言魏散亡自

廣陵始 按魏之揚州治壽春與廣陵無預皋旣不  
攷而爲此言新舊二史乃采其語入之本傳甚矣史  
家之無學也王凌刊本皆作王陵亦誤

韓洄傳

終國子祭酒 唐會要證曰成

源乾曜傳

開元八年復爲黃門侍郎同中書門下三品 本紀宰  
相表俱云同中書門下平章事

許景先傳

景先常州義興人曾祖緒武德時以佐命功歷左散騎

常侍封真定公遂家洛陽 列傳第十三卷附許世  
緒事此避太宗諱去世字彼傳云并州人而此云常  
州未知孰是世緒官左散騎常侍本傳亦不載以史  
例言之當云曾祖緒自有傳

齊澣傳

澣嘗稱陳希烈朱遙苗晉卿韋述之才後皆大顯 按  
史家之義獎忠義而抑姦諛唐史於齊澣傳云澣嘗  
稱陳希烈之才於魏知古傳云薦伊闕尉陳希烈等  
後皆有聞于時於陸餘慶傳云薦河南達奚珣等後  
皆爲知名士希烈珣唐之大臣身爲賊相雖貴顯何

足道而輒津津述之可謂無識之甚也

李峴傳

吳王恪孫也 按宗室傳恪子琨琨子稭稭子峴世系表亦同則峴乃恪之曾孫

李回傳

新興王德良六世孫 按宗室傳稱長樂郡王幼良六世孫與本傳異而宗室世系表以回爲長平郡王叔良六世孫又與兩傳俱異攷舊史回傳父名如仙據世系表如仙爲長平王五世孫則回出自叔良之後審矣

贈刑部尚書 唐會要贈司徒諡文懿

居宰相以宗室進者九人林甫姦諛幾亡天下李程知  
柔在位無所發明其餘以材稱職號賢宰相 按宗  
室世系表宰相十一人此云九人者知柔以嗣王權  
知中書事非真當國麟亦屬疎故不數也林甫姦邪  
宗閔植黨皆爲宗室之恥其餘才局各殊要爲稱職  
程雖蒙惡諛而在位能直諫請選名儒侍講禁中亦  
得輔導幼主之誼新史特立宗室宰相一篇意以諷  
當時之不用宗室耳朕舍宗閔而厚責程吾不知其  
何說也程上不當有李字

劉知幾傳

劉子元名知幾以元宗諱嫌故以字行 按列傳名字  
之下例書某州縣人其無可攷者亦於傳首言之如  
衛伯玉宋申錫高欽傳云史失其何所人鄭薰傳云  
亡鄉里世系是也而劉知幾元結韓全義劉栖楚韋  
表微李翱王璠裴坦鄭縻孫奭蕭穎士柳并皇甫冉  
諸人傳皆闕之結傳載自釋 篇述其族望鄉里甚  
備篇首不書可也知幾傳敘其撰家史稱彭城叢亭  
里諸劉出楚孝王囂曾孫居巢侯般云云篇首不書  
亦可也

知幾見知柔見文苑傳云徐州彭城人

若全義諸人鄉里既無



可致當依衛伯玉諸傳之例方合史法

蔣父傳

與許孟容韋貫之刪正制敕三十篇爲開元格後敕  
藝文志有元和剛定制敕卽此書

尋者錡昆弟其父若幽死社稷 李錡父名國貞此云  
若幽者攷舊書肅宗紀上元二年殿中監李若幽賜  
名國貞新史失載賜名一節此語遂難曉矣

張獻恭傳

子煦贈太子太保 唐會要贈太子少保諡曰罔

張獻甫傳

贈司空 唐會要諡曰烈

牛仙客傳

朕且用康晉 晉當作晉讀為辨隋唐以前俗字所謂  
巧言為辨也

唐書十四

廿二史攷異五十四

錢大昕學

李泌傳

桀曰我生不有命在天 此紂語非桀語

泌建言學士加大始中宗時及張說爲之固辭乃以學士知院事至崔圓復爲大學士亦引泌爲讓而止

王伯厚曰崔圓相肅宗在泌前會要貞元四年五月泌奏張說懇辭大字衆稱達禮至德二年崔圓爲相加集賢大學士因循成例望削去大字此乃泌引圓

爲辭傳誤矣

見困學紀聞

予按百官志修文館景龍二年

置大學士四人

修文館即  
去文館

即泌所謂學士加大始中

宗時也志又云集賢院至德二年置大學士貞元四  
年罷大學士又有崇元學天寶二載改曰崇賢館置

大學士二人以宰相爲之貞元四年崇元館

即崇  
賢館罷

大學士志所云至德二年正崔圓爲相之日集賢有

大學士自圓始而宰相之領大學士不始於此蓋自

天寶初立崇賢館已有之矣夏竦而上之則景龍初

修文館大學士李嶠宗楚客趙彥昭韋嗣立四八亦

皆宰相也但睿宗以後大學士久已不除開元時張

說以宰相領集賢院事不敢居大學士之名而六典

亦無此職其後李林甫陳希烈輩但兼崇元館大學士而集賢仍無大名至崔圖始爲之德宗貞元四年因李泌之請并集賢崇元皆去大字狀攷之新舊二史如楊綰常袞裴度牛僧孺崔鉉韋昭度孔緯杜讓能徐彥若崔垂休獨孤損裴樞柳璨皆加宏文館大學士李勉劉從一裴垠賈餗崔暉李德裕馬植鄭朗崔慎山蕭鄴杜讓能張濟崔垂休崔遠裴贄楊涉皆加集賢殿大學士綰袞勉從一在泌入相以前其餘諸人皆在泌後則是貞元罷大學士之後未久而復置也攷權德輿於元和二年作昭文館大學士壁記

云太宗文皇帝始于宏文殿側創宏文館盛選重名  
虞世南褚亮而下爲之學士更直密侍于其中其後  
徙于門下省景龍初始置大學士名命益重多以宰  
司處之每二府爰立則統于黃樞而或署或否不爲  
恆制孝文後元二十年前斯職闕焉前年秋八月今  
河中司空公居之今年夏五月相國蕭公居之記所  
稱司空公者杜黃裳也蕭公謂武元衡也德宗諡曰  
孝文記云闕職二十年者卽謂貞元以後學士削去  
大字也以是推之大學士復置必在元和之初矣大  
學士爲宰相加官其罷而復置宜見於百官志而史

家不能改而著之疎畧甚矣宋初避諱改宏文爲昭  
文此德輿壁記亦稱昭文蓋宋時校書者追改

苗晉卿傳

諷有司改諡文貞 唐會要太常諡爲懿獻及敕出改

諡文懿

裴昆傳

有詔贈大尉 唐會要諡曰獻穆

裴向傳

贈太子少保 唐會要諡曰穆

崔光遠傳

代蕭華爲魏州節度使 按方鎮表是府無魏州節度  
舊史肅宗紀但云魏州刺史非節度也 唐會要贈  
揚州大都督諡曰威

李麟傳

父濬贈戶部尚書諡曰誠 誠當作成唐會要有贈戶  
部尚書眞源縣子李璿諡曰成卽此人也濬璿字形  
相似

楊綰傳

父溫玉在武后時爲顯官 唐會要溫玉官岐王傳恆  
農縣公諡曰忠



崔植傳

終華州刺史 唐會要諡曰敬

李承傳

幼孤其兄睦養之 宰相世系表承在睦之前似承兄  
而睦弟當是表誤

韋倫傳

父光乘在開元天寶間爲朔方節度使 唐會要光乘  
贈太子少傅諡曰烈

來瑱傳

明年上文有乾元二年則徙瑱山南東道襄郢均房金

是年乃上元元年

商隨郢復十州節度使 按方鎮表至德二載升襄陽防禦使爲山南東道節度使領襄鄆隋唐安均房金商九州治襄州此傳有郢復而無唐安與表互異又傳稱十州節度今數之止有九州則史文當有脫誤攷下文呂誼王仲昇等言瑱得士心不可以留乃改山南東道襄鄆唐復隋郢六州節度通鑑亦云割商金均房別置觀察使令瑱止領六州以是推之似唐州元在瑱所管十州之內傳偶脫唐字耳

嚴礪傳

贈司空

唐會要諡曰威

李栖筠傳

李峴爲大夫以三司按羣臣陷賊者 按呂誼傳亦稱

御史大夫李峴刑法志亦同而峴傳不云爲御史大夫蓋脫漏也

李吉甫傳

德宗以來姑息藩鎮有終身不易地者吉甫爲相茲餘  
凡易三十六鎮最分明 按吉甫以元和二年正月拜相明年九月出鎮其時魏博則出季安恆冀則  
王士真盧龍則劉濟淄青則李師道淮西則吳少誠  
滄景則程權易定則張茂昭汴宋則韓宏澤潞則盧

攷異

唐書十四

五

從史陳許則劉昌裔河東則嚴綬鳳翔隴右則李廓  
東川則嚴礪俱未徙節所更代者不過河中邠寧西  
川諸近鎮而已恐未必有三十六鎮之多傳文不足  
深信

有司諡曰敬憲度支郎中張仲方非之帝怒貶仲方更  
賜諡曰忠懿 唐會要吉甫諡恭懿張仲方傳吉甫  
卒太常諡恭懿博士尉遲汾請諡敬憲俱不云忠懿

王思禮傳

諡曰武烈 唐會要思禮諡兩見一云武一云武烈蓋  
傳聞異詞

曲環傳

贈司空 唐會要贈司徒諡武烈

張孝忠傳

寶臣晚節稍忌刻殺大將李獻誠等

舊史

按藩鎮傳

敘李寶臣殺骨鯁將辛忠義盧俶許崇俊張南容張彭老等二十餘人不及獻誠其下敎惟岳事又載牙將衛常寧與獻誠語則獻誠實未死也此傳誤

李英傳

贈尚書右僕射 唐會要諡曰肅

常袞傳

拜門下侍郎同中書門下平章事宏文崇文館大學士  
按百官志崇文館隸東宮乾元初以宰相爲學士  
總館事不云何年置大學士亦脫漏也

裘爲相散官纔朝議而無封爵郭子儀言於帝遂加銀  
青光祿大夫封河內郡公 百官志朝議大夫從五  
品下銀青光祿大夫正四品上

齊映傳

贈禮部尚書諡曰忠 唐會要諡恭懿

姜公輔傳

乃擢公輔諫議大夫同中書門下平章事 按諫議大

夫是時纔正五品耳諫議給事皆門下省官故得以本官入相其後罷爲太子左庶子左右庶子却是正四品官雖罷相猶爲序遷也

顏真卿傳

祕書監師古五世從孫 按真卿爲其父惟貞撰廟碑敘世系最悉真卿父惟貞祖昭甫曾祖勣禮勣禮與師古竝思魯之子則真卿乃師古之從曾孫也

楊朝晟傳

十七年卒于屯 唐會要贈尚書右僕射諡曰毅

張建封傳

張異

冊贈司徒 唐會要諡曰襄

韓宏傳

涪州匡城人 按韓愈撰神道碑以爲陳之太康人

盧坦傳

贈禮部尚書 唐會要諡曰貞

閻濟美傳

諡曰溫 唐會要濟美官太子少傅諡曰良

劉伯芻傳

贈工部尚書 唐會要諡曰敬

濟孟陽傳



父炎大歷末官右庶子進禮部侍郎 唐會要贈右僕

射諡曰文

崔龜從傳

遷太常博士言九宮皆列星不容爲大祠詔可其議九  
宮遂爲中祠 按舊書禮儀志及舒元與傳大和二  
年元與爲監察御史奏言九宮之神於天地猶子男  
陛下爲天子反臣于天之子男臣竊以爲過合稱皇  
帝遣某官致祭不宜稱臣與名詔都省議皆如元與  
言乃降爲中祠朕則九宮之議實起于元與其時龜  
從爲太常博士或在都省預議之列故舊書本傳亦

及之狀不應舍元與而專歸功于龜從也

韋夏卿傳

贈尚書左僕射諡曰獻 唐會要諡曰簡

李遜傳

諡曰貞 唐會要李遜諡凡兩見一云貞一云恭肅蓋

傳聞異詞

遜弟建贈工部尚書 唐會要諡曰元

孔幾傳

效子遵孺遵孺子緯 宰相世系表作溫孺

穆贊傳

贈工部尚書 唐會要諡曰敬

崔邠傳

諡曰文簡 唐會要諡曰宣簡

柳玼傳

昭國里崔山南瑄子孫之盛仕族罕比山南曾祖母長孫夫人年高無齒祖母唐夫人事姑孝每旦櫛縫笄拜階下升堂乳姑長孫不粒食者數年一日病言無以報吾婦冀子孫皆得如婦孝 此事亦見崔琪傳瑄瑒之兄也

王彥威傳

攷異

諡曰肅 唐會要諡曰憲

鄭裔 傳

遷給事中楊漢公爲荆南節度使坐貪吝貶祕書監尋  
拜河州刺史裔綽與鄭公輿封還制書帝自卽位諫  
臣規正無不納至是有爲漢公地者遂終不易會賜  
宴禁中天子擊毬至門下官謂二人曰近諭漢公事  
類朋黨者裔綽曰同州太宗興王地陛下爲人子孫  
當慎所付且漢公墨沒敗官奈何以重地私之帝變  
色翌日貶商州刺史 按裔綽官給事中止正五品  
出補商州刺史乃從三品

唐制上引刺史從三品中  
下州刺史正四品裔爲望

州當准

上品外除乃謂之貶漢公官祕書監本從三

品轉國子祭酒亦從三品自祭酒除同州刺史仍從

三品同品而補外乃謂之擢

漢公傳稱遷國子祭酒宣宗擢爲同州刺史

若同華兩州京師近輔刺史體制與節度觀察畧同

同州刺史兼木州防禦使華州

刺史兼潼關防禦鎮國軍使 舊書憲宗紀元和元

年御史中丞武元衡奏中書門下御史臺五品已上

官尚書省四品已上諸司正三已上從三品職事官

東都留守轉運鹽鐵節度觀察使團練防禦招討經

畧等使河南尹同華州刺史諸衛諸軍三品已上官

除授皆入閣謝其餘官許於宣政南班拜訖便退此

其證也中葉以後士大夫尤以方面爲重視寺監爲

散地故漢公之刺同州當時以爲美除給事中者門

下五品官又主封駁職清而地近較之外州刺史之

疏遠大不侔矣故裔綽以給事出典商州雖非邊方

猶爲貶也同州朝邑縣有長春宮刺史例兼長春宮

使太宗爲秦王時嘗鎮長春宮故云太宗與王地也

此事又見漢公傳首尾百數十言複沓亦已甚矣

時猶衣綠因詔賜緋魚 唐制五品已上衣緋三品已

上衣紫裔綽官五品已久而猶衣綠者唐時臣僚章

服不依職事官之崇卑惟論散官之品秩雖以宰相

之尊而散官未及三品猶以賜紫金魚袋結銜試以  
舊史宣宗紀證之如正議大夫守中書侍郎同平章  
事集賢殿大學士賜紫金魚袋馬植太中大夫守中  
書侍郎兼禮部尚書同平章事賜紫金魚袋崔慎由  
通議大夫守中書侍郎兼禮部尚書同平章事集賢  
殿大學士賜紫金魚袋鄭昉朝散大夫守工部尚書  
同平章事集賢殿大學士賜紫金魚袋蕭鄴朝議大  
夫守戶部侍郎同平章事判度支賜紫金魚袋劉球  
皆見任宰相中書侍郎六部尚書又皆三品職事官  
也又如正議大夫守御史大夫賜紫金魚袋崔鉉朝

散大夫守京兆尹賜紫金魚袋韋澳皆見任三品職  
事官昭義節度使檢校禮部尚書兼潞州大都督府  
長史御史大夫賜紫金魚袋鄭洎邠寧慶節度使檢  
校禮部尚書邠州刺史賜紫金魚袋畢誠夏綏銀宥  
節度使通議大夫檢校左散騎常侍夏州刺史御史  
大夫賜紫金魚袋鄭助邠寧節度使朝議大夫檢校  
工部尚書邠州刺史賜紫金魚袋柳憲朔方節度使  
朝散大夫檢校左散騎常侍靈州大都督府長史賜  
紫金魚袋劉潼山南西道節度使中散大夫檢校禮  
部尚書興元尹賜紫金魚袋蔣係朝議大夫檢校禮



部尚書兼太原尹北都留守賜紫金魚袋劉瑑皆見  
任方鎮檢校官並至三品而散官未到金紫銀青則  
非賜不得衣紫也又如翰林學士朝議郎守尚書司  
勳郎中知制誥賜緋魚袋孔溫裕朝議郎守中書舍  
人權知禮部貢舉賜緋魚袋李藩皆五品職事官之  
清要者而散官未到大夫則非賜不得衣緋也牛叢  
以司勳員外郎爲睦州刺史賜金紫謝曰臣今衣刺  
史所假緋卽賜紫爲越等乃賜銀緋叢與裔綽皆嘗  
任五品職事官而散官未到五品故須銀緋之賜

賈耽傳

滄州南皮人 按地理志南皮隸景州景州本滄州所  
分耽仕於德順二宗之世南皮猶隸滄州也鄭餘慶  
撰神道碑云清池人

杜棕傳

權德輿爲相其壻翰林學士獨孤郁以嫌自白憲宗見  
郁文雅歎曰德輿有壻乃爾 此事又見郁傳當剛  
此存彼

始宣宗世廢王以下五王處大明宮內院而羈王居十  
六宅帝大漸樞密使王歸長馬公儒等以遺詔立廢  
王而左軍中尉王宗實等入殿中以爲歸長等矯詔

乃迎鄆王立之是爲懿宗 此事已見懿宗紀毋庸  
夏入此傳若云初懿宗之立非宣宗意及卽位久之  
遣樞密使云云則文省而意益明矣

久之遣樞密使楊慶詣中書獨揖宗它宰相畢誠杜審  
權將伸不敢進乃授宗中人請帝監國奏因諭宗劾  
大臣名不在者抵罪宗遽封授使者復命謂慶曰上  
踐祚未久君等秉權以愛憎殺大臣公等禍無日矣  
慶色沮去帝怒亦釋大臣遂安 按懿宗紀及宰相  
表宗以咸通二年二月由尚書左僕射判度支再入  
相距懿宗踐祚之始已兩年矣使帝銜怒諸大臣欲

置之死地當不俟此時傳所云未可深信也

令狐綯傳

監軍郝厚本 杜棕傳云戎將郭厚本

子瀉渙渢 宰相世系表以渢爲定之孫誤

裴延齡傳

死年六十九人語以相安唯帝悼不已冊贈太子太傅

上柱國 按舊書延齡傳延齡死中外相賀唯德宗

悼惜不已新史改云人語以相安詞意殊難解矣舊

史云贈太子少保此云太子太傅未知孰是上柱國

勳視正二品然唐時勳級最濫庶僚軍校授上柱國

者甚多杜佑云魏置柱國當時貴寵第一國家以爲  
勳級纔得地三十頃耳延齡贈上柱國未爲異數它  
傳亦未有載勳官者此所謂不必書而書也

韋渠牟傳

贈刑部尚書諡曰忠 唐會要諡曰隱

李齊運傳

蔣王惲孫 按宰相世系表乃惲之曾孫

劉禹錫傳

宰相裴度兼集賢殿大學士 按度本傳進宏文館大  
學士在平蔡之後此兼集賢殿大學士當在文宗大

和初本傳不載者畧之也

叔文北海人自言猛之後 按叔文傳云越州山陰人  
此云北海者舉其族望也

柳宗元傳

從曾祖奭爲中書令得罪武后死高宗時 按列傳第  
三十七卷柳澤傳末已附出奭事此復承宗元墓志  
之文書之吳縝所謂宜削而反存也